

**Kalaallit Nunaanni pinerluttulerinermi inatsisip allanngortinneqarnissaanut inatsimmut missingiutip (akuersissuteqaqqaarnissamik tunngavilimmik pinngitsaaliilluni atoqatiginninneq pillugu aalajangersagaq) Kalaallit Nunaanni Namminersorlutik Oqartussanit akuersissuteqarnissaa pillugu Inatsisartut aalajangiiffigisassaattut siunnersuut**

(Aatsitassanut Inatsisillu Atuutsinneqarnerannut Naalakkersuisoq)

**Saqqummiussissut**

(Aatsitassanut Inatsisillu Atuutsinneqarnerannut Naalakkersuisoq)

**Siullermeerinninneq**

Inatsisit atuutsinneqarnerannut suliassaqarfimmik pitsaanerulersitsinissamik Naalakkersuisut kissaateqarnerat tunngavigalugu inatsisissatut siunnersuut manna saqqummiunneqarpoq, taamaalilluni suliassaqarfik sunniuteqarluartuuniassammat ullutsinnullu naleqquttuulluni, taamaalillunilu innuttaasut kissaataannut naapertuilluartumillu pineqarnermik misiginerannut pitsaasumik naapertuunniassammat.

Taamaattumik ukioq kingulleq maajimi, pinerluttulerinermilu inatsimmi akuersissuteqaqqaarnissamik tunngavilimmik pinngitsaaliilluni aalajangersakkamik, qallunaat pillaasarnermik inatsisaanni aalajangersakkami 1. januar 2021-imi atuutilersumi aalajangersakkap assinganik, atuutilersitsisoqarnissaa pillugu noqqaassumik Naalakkersuisut Inatsiseqarnermut ministereqarfimmut saaffiginnissimapput.

Pinngitsaaliineq tassaavoq inunnut navianaatilimmik pinerluuteqarnerit ilungersunarnerpaat ilaat, aamma taamaaliernerup kinguaassiutitigut nammineq aalajangiisinnaatitaanerup peqqarniitsumik innarlerneqarneranik kinguneqartarpoq. Inuk kinaluunniit timimi aalajangiiffiginissaanut kiffaanngissuseqarpoq pisinnaatitaallunilu. Taamaammat aalajangersakkap atuutilersinneqarnerani, kinguaassiutitigut iliuuseqarnerni tamani illuatungeriit tamarmik kissaataannik tunngaveqarnissap kalerrisaarutiginnissaa pingaaruteqarluinnarpoq. Allatut oqaatigalugu taakku nammineq kajumissusertik tunngavigalugu taamaaliorsimassapput. Taamaattoqanngippat pinngitsaaliinerussiaaq.

Taamaammat aalajangersakkamik, akuersissuteqaqqaarani atoqatiginninnermik pinngitsaaliinngortitsisumik atuutilersitsineq, politiinit, unnerluussisussaataasunit eqqartuussivinniillu pinngitsaaliinermik suliat qanoq nalilerneqartarnerannut suliarineqartarnerannullu taamaallaat kinguneqarnaviannigilaq. Inuiaqatigiinnili aamma isummat allanngortinnissaannut ilapittuutaassaaq, taamaattoqarneralu neriuginartumik inuit allat killiliussaannik ataqqinnissap ukkatarineqarnerulerneranik kinguneqassaaq, aamma piffissaq ungasinnerusoq isigalugu killissanik taakkuninnga qaangiisartut ikiliartornerannik kinguneqassalluni.

Akuersissuteqartoqarsimannginneranik pisariaqartinneqartumik uppersaanissaq suli unnerluussisussaataasut suliarisussaammassuk pingaaruteqarpoq erseqqissaatigissallugu. Suliami pissutsit piviusut kinaassusersiunngitsumik aamma ataatsimoortillugit nalilersorneqarnerisigut tamanna pissaaq.

Taamaaliornikkut pinngitsaalineqarsimanermik eqqugaasup illersorneqarnissaanut pinngitsaaliisimasutullu unnerluussaasup inatsisitigut isumannaatsuunissaannut qajassuussineq naligiissinneqassapput.

Pinngitsaalineqarsimanermik eqqugaasut inatsisitigut illersorneqarnissamik pisinnaatitaaffinik inuiaqatigiittut tunniussisussaavugut.

Suliassaqarfimmut nutaamik inatsisiliorneq allannguinnermik pilersitsissappat, kinguaassiutitigut nammineq aalajangiisinnaatitaaneq qanoq isumaqarnerisigut pillugu innuttaasunut paasititsiniaanissaq pingaaruteqarpoq. Sverigimi aalajangersakkap assinganik eqqusisoqarneranut atatillugu, ingammik inuusuttunut ilinniartitsineq paasissutissiinerlu iluatsilluarsimapput. Taamaammatt inatsit atortuulersinneqartinnagu, allannguutit pillugit paasititsiniaanerup allartinneqarnissaa Naalakkersuisut sulissutigissavaat.

Taamatut oqaaseqarlutik Inatsisartuni suliarineqarnissaanut Naalakkersuisut immikkoortoq tunniuppaat.